

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১২/২০১৭

ঢাকা, বুধবার ৭ জুন ২০১৭, ২৪ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। একনেকে বর্জ্য ব্যবস্থাপনা আধুনিকায়নসহ ১১ প্রকল্প অনুমোদন
- ২। বিচারপতি ও কূটনীতিকদের সম্মানে প্রধানমন্ত্রীর ইফতার
- ৩। জাতীয় সংসদে ১৮ হাজার ৩৭০ কোটি টাকার সম্পূরক বাজেট পাস
- ৪। মুদ্রা পাচারের সুযোগ কমাতে ব্যবস্থা জুলাইয়ে : অর্থমন্ত্রী
- ৫। চাহিদার ৯৮% ওষুধ দেশেই উৎপাদিত হয় : সংসদে স্বাস্থ্যমন্ত্রী
- ৬। চলতি অর্থবছরের প্রথম এগারো মাসে এডিপির ৬৫ % বাস্তবায়ন
- ৭। ২০১৬-১৭ অর্থবছরের প্রথম ১১ মাসে রফতানি আয় ৩ হাজার কোটি ডলার ছাড়িয়েছে
- ৮। ঐতিহাসিক ৬ দফা দিবস আজ
- ৯। কর্মকর্তাদের কাজের দক্ষতা বাড়াতে হবে : শিক্ষামন্ত্রী
- ১০। শান্তিরক্ষায় বাংলাদেশ পুলিশের প্রশংসায় জাতিসংঘ

১। একনেকে বর্জ্য ব্যবস্থাপনা আধুনিকায়নসহ ১১ প্রকল্প অনুমোদন

ঢাকা এবং চট্টগ্রাম সিটি করপোরেশনের বর্জ্য ব্যবস্থাপনা আধুনিকায়নসহ ১১ প্রকল্পের চূড়ান্ত অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। এসব প্রকল্প বাস্তবায়নে মোট ব্যয় ধরা হয়েছে ৩ হাজার ৭২৩ কোটি ৬ লাখ টাকা। এর মধ্যে সরকারি তহবিল থেকে ৩ হাজার ৬০৩ কোটি ৬৭ লাখ টাকা, বৈদেশিক সহায়তা থেকে ৯৬ কোটি ৮৯ লাখ এবং বাস্তবায়নকারী সংস্থা থেকে পাওয়া যাবে ২২ কোটি ৫০ লাখ টাকা। গতকাল ৬ জুন মঙ্গলবার রাজধানীর শেরেবাংলানগরে এনইসি সম্মেলনক্ষেত্রে একনেক চেয়ারপারসন ও প্রধানমন্ত্রী শেখ হাসিনার সভাপতিত্বে অনুষ্ঠিত একনেক সভায় এসব প্রকল্প অনুমোদন দেওয়া হয়। সূত্র-সংবাদ (শেষ পৃ.,ক.২), জনকণ্ঠ (পৃ.১,ক.৪), বাংলাদেশ টুডে (শেষ পৃ.,ক.১), অবজারভার (শেষ পৃ.১৭,ক.১)।

২। বিচারপতি ও কূটনীতিকদের সম্মানে প্রধানমন্ত্রীর ইফতার

প্রধানমন্ত্রী শেখ হাসিনা গতকাল ৬ জুন মঙ্গলবার গণভবনে বিচারপতি, কূটনীতিক এবং পদস্থ বেসামরিক ও সামরিক কর্মকর্তাদের সম্মানে ইফতারের আয়োজন করেন। প্রধানমন্ত্রী ইফতারের বিভিন্ন টেবিল ঘুরে আমন্ত্রিত অতিথিদের সঙ্গে শুভেচ্ছা বিনিময় করেন এবং তাঁদের সম্পর্কে খোঁজখবর নেন। ইফতারের আগে জাতির অব্যাহত শান্তি, অগ্রগতি ও সমৃদ্ধি কামনা করে বিশেষ মোনাজাত করা হয়। সূত্র-জনকণ্ঠ (শেষ পৃ.,ক.৬), সমকাল (পৃ.২,ক.৮), বাংলাদেশ টুডে (পৃ.২,ক.৫), ইন্ডিপেনডেন্ট (পৃ.৩,ক.১)।

৩। জাতীয় সংসদে ১৮ হাজার ৩৭০ কোটি টাকার সম্পূরক বাজেট পাস

জাতীয় সংসদে চলতি ২০১৬-১৭ অর্থবছরের জন্য ১৮ হাজার ৩৭০ কোটি ২২ লাখ ৫০ হাজার টাকার সম্পূরক বাজেট পাস হয়েছে। গতকাল দশম জাতীয় সংসদের ১৬তম (বাজেট) অধিবেশনের ৫ম কার্যদিবসে অর্থমন্ত্রী আবুল মাল আবদুল মুহিত কর্তৃক উত্থাপিত নির্দিষ্টকরণ (সম্পূরক) বিল-২০১৭ কর্তৃভোটে পাসের মধ্য দিয়ে এই সম্পূরক বাজেট পাশ হয়। সূত্র-সংবাদ (পৃ.১,ক.১), জনকণ্ঠ (পৃ.১,ক.৬), বাংলাদেশ টুডে (পৃ.১,ক.৬), ইন্ডিপেনডেন্ট (পৃ.১,ক.১)।

৪। মুদ্রা পাচারের সুযোগ কমাতে ব্যবস্থা জুলাইয়ে : অর্থমন্ত্রী

দেশ থেকে মুদ্রা পাচারের সুযোগ কমাতে জুলাই মাসে নতুন কিছু ব্যবস্থা নেওয়া হবে বলে জানিয়েছেন অর্থমন্ত্রী আবুল মাল আবদুল মুহিত। তিনি আরো বলেন, ব্যাংকে আমানতের ওপর কর ধার্য নতুন কিছু নয়। এটা আগে থেকেই ছিল। আমি করের হারটা একটু খানি বাড়িয়েছি। এছাড়া সঞ্চয়পত্রের সুদ ব্যাংক সুদের চেয়ে ২ শতাংশ বেশি বা তার কাছাকাছি থাকবে বলে জানান তিনি। গতকাল ৬ জুন মঙ্গলবার সংসদে ২০১৬-১৭ অর্থবছরের সম্পূরক বাজেটের ওপর সাধারণ আলোচনায় অংশ নিয়ে তিনি একথা বলেন। সূত্র-সংবাদ (পৃ.১,ক.৪), ইন্ডেফাক (পৃ.১,ক.৩), ফিন্যানশিয়াল এক্সপ্রেস (পৃ.১,ক.৬), এশিয়ান এজ (পৃ.১১,ক.৬)।

৫। চাহিদার ৯৮% ওষুধ দেশেই উৎপাদিত হয় : সংসদে স্বাস্থ্যমন্ত্রী

স্বাস্থ্য ও পরিবার কল্যাণমন্ত্রী মোহাম্মদ নাসিম বলেছেন, সরকারের আন্তরিকতা ও উদারনীতির ফলে বাংলাদেশের ওষুধ শিল্প অন্যতম শিল্প সেক্টরে পরিণত হয়েছে। দেশীয় চাহিদার শতকরা ৯৮ ভাগের বেশি ওষুধ বর্তমানে স্থানীয়ভাবে উৎপাদিত হয়। দেশে উৎপাদিত বিভিন্ন প্রকার ওষুধ ও ওষুধের কাঁচামাল বিশ্বের ১২৭টি দেশে রপ্তানি হচ্ছে। গতকাল জাতীয় সংসদের বাজেট অধিবেশনের মন্ত্রী এসব কথা বলেন। সূত্র-সংবাদ (শেষ পৃ.,ক.৪), ইন্ডেফাক (শেষ পৃ.,ক.৫), বাংলাদেশ টুডে (পৃ.১,ক.২), ইন্ডিপেনডেন্ট (পৃ.৪,ক.১)।

৬। চলতি অর্থবছরের প্রথম এগারো মাসে এডিপি ৬৫% বাস্তবায়ন

চলতি অর্থবছরের প্রথম এগারো মাসে (জুলাই-মে) সংশোধিত বার্ষিক উন্নয়ন কর্মসূচির (এডিপি) ৬৫ শতাংশ অর্থ ব্যয় হয়েছে। আগের অর্থবছরের একই সময়ে এডিপি বাস্তবায়নের হার ছিল ৬২ শতাংশ। গতকাল ৬ জুন মঙ্গলবার জাতীয় অর্থনৈতিক পরিষদের নির্বাহী কমিটির (একনেক) সভা শেষে পরিকল্পনামন্ত্রী আ হ ম মুস্তফা কামাল এডিপি বাস্তবায়নের এ তথ্য জানান। সূত্র-সমকাল (পৃ.১২,ক.৪), ইন্ডেফাক (পৃ.১৮,ক.৬), ফিন্যানশিয়াল এক্সপ্রেস (পৃ.১,ক.২)।

৭। ২০১৬-১৭ অর্থবছরের প্রথম ১১ মাসে রফতানি আয় ৩ হাজার কোটি ডলার ছাড়িয়েছে

২০১৬-১৭ অর্থবছরের জুলাই-মে মেয়াদে অর্থাৎ অর্থবছরের প্রথম ১১ মাসে রফতানি খাতে আয় হয়েছে ৩ হাজার ১৭৯ কোটি ৭ লাখ মার্কিন ডলার, যা গত ২০১৫-১৬ অর্থবছরের একই সময়ের রফতানি আয়ের তুলনায় ১১২ কোটি ৬৫ লাখ ডলার বেশি। এ সময়ে প্রবৃদ্ধি অর্জিত হয়েছে ৩ দশমিক ৬৭ শতাংশ। বছরের ব্যবধানে রফতানি আয় বাড়লেও চলতি অর্থবছরের প্রথম ১১ মাসে রফতানি লক্ষ্যমাত্রা অর্জিত হয়নি। গতকাল ৬ জুন মঙ্গলবার রফতানি উন্নয়ন ব্যুরোর (ইপিবি) প্রকাশিত হালনাগাদ প্রতিবেদনে এসব তথ্য উঠে এসেছে। সূত্র-জনকণ্ঠ (পৃ.১৮,ক.১), সমকাল (পৃ.১২,ক.১)।

৮। ঐতিহাসিক ৬ দফা দিবস আজ

আজ ঐতিহাসিক ৭ জুন, ছয় দফা দিবস। বাঙালি জাতির মুক্তি সংগ্রামের ইতিহাসে অনন্য প্রতিবাদী, আত্মত্যাগে ভাস্বর ও গৌরবোজ্জ্বল সংগ্রামী একটি দিন। এ উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। বাণীতে রাষ্ট্রপতি মো. আবদুল হামিদ বলেছেন, ঐতিহাসিক ৬ দফা শুধু বাঙালি জাতির মুক্তির সনদ নয়, সারাবিশ্বের নিপীড়িত নির্যাতিত মানুষের মুক্তি আন্দোলনের অনুপ্রেরণারও উৎস। প্রধানমন্ত্রী শেখ হাসিনা গতকাল ৬ জুন মঙ্গলবার তাঁর বাণীতে বলেছেন, ঐতিহাসিক ৭ জুনসহ সকল গণতান্ত্রিক আন্দোলন ও সংগ্রামের চেতনায় উদ্বুদ্ধ হয়ে দেশের মানুষের গণতান্ত্রিক অধিকার অক্ষুণ্ণ রাখতে সরকার বদ্ধপরিকর। সূত্র-জনকণ্ঠ (পৃ.১,ক.২), সমকাল (পৃ.২,ক.৭), বাংলাদেশ টুডে (পৃ.১,ক.১), এশিয়ান এজ (শেষ পৃ.,ক.৮)।

৯। কর্মকর্তাদের কাজের দক্ষতা বাড়াতে হবে : শিক্ষামন্ত্রী

শিক্ষামন্ত্রী নুরুল ইসলাম নাহিদ বলেন, প্রকল্পের কাজ সঠিকভাবে বাস্তবায়নে ও মূল্যায়নে পরিবীক্ষণ প্রতিবেদন খুবই গুরুত্বপূর্ণ। এ জন্য মন্ত্রণালয়ের কর্মকর্তাদের কাজের মান ও দক্ষতা বাড়াতে হবে। কর্মকর্তাদের উদ্দেশ্যে তিনি বলেন, প্রকল্প বাস্তবায়নে সমস্যাগুলো আগে চিহ্নিত করুন। এরপর প্রতিবেদন প্রস্তুত করে সে অনুযায়ী সংশোধনের উদ্যোগ নিলে প্রকল্প বাস্তবায়ন আরও সহজ হবে। গতকাল ৬ জুন মঙ্গলবার রাজধানীর বাংলামটরে বিশ্বসাহিত্য কেন্দ্র মিলনায়তনে মাধ্যমিক ও উচ্চ শিক্ষা (মাউশি) অধিদপ্তরের অর্ধবার্ষিক পরিবীক্ষণ প্রতিবেদন প্রকাশনা অনুষ্ঠানে প্রধান অতিথির বক্তব্যে তিনি এসব কথা বলেন। মাউশির মনিটরিং অ্যান্ড ইভ্যালুয়েশন উইং বিভিন্ন প্রকল্পের ২০১৬ সালের জুলাই থেকে ডিসেম্বর পর্যন্ত এ প্রতিবেদন তৈরি করে। সূত্র-সমকাল (পৃ.৫,ক.৫), প্রথম আলো (পৃ.৩,ক.৩), অবজারভার (পৃ.৪,ক.৭)।

১০। শান্তিরক্ষায় বাংলাদেশ পুলিশের প্রশংসায় জাতিসংঘ

বাংলাদেশ পুলিশের উচ্ছ্বসিত প্রশংসা করেছেন জাতিসংঘ আন্ডার সেক্রেটারি জেনারেল জেন প্যারি ল্যাক্রোয়াল। তিনি বলেছেন, পৃথিবীর যুদ্ধবিধ্বস্ত বিভিন্ন দেশে শান্তিরক্ষায় বাংলাদেশ পুলিশের দক্ষতা, পেশাদারিত্ব ও সাহসিকতা অত্যন্ত উঁচুমানের। তারা বিভিন্ন দেশে শান্তি প্রতিষ্ঠায় গৌরবোজ্জ্বল ভূমিকা এবং অনবদ্য অবদান রাখছেন। পুলিশ সদর দফতরের এক প্রেস বিজ্ঞপ্তিতে এসব কথা জানানো হয়েছে। বিজ্ঞপ্তিতে বলা হয়, মার্কিন যুক্তরাষ্ট্রে সফররত আইজিপি এ কে এম শহীদুল হক গত ৫ জুন সোমবার নিউইয়র্কে জাতিসংঘ সদর দফতরে ল্যাক্রোয়ালের সঙ্গে বৈঠক করেন। বৈঠকে জাতিসংঘের এই কর্মকর্তা বাংলাদেশ পুলিশের প্রশংসা করেন। সূত্র-যুগান্তর (পৃ.২,ক.৪), সমকাল (পৃ.৫,ক.২)।

সম্পাদকীয়

ক. ইন্ডেক্স : রাজধানীর বিভিন্ন এলাকায় পানির সংকট তীব্র হয়ে উঠায় ওয়াসাকে দ্রুত পানি সরবরাহ নিশ্চিত করার সুপারিশ।

- খ. সংবাদ : গার্হস্থ্য অর্থনীতি কলেজের হলগুলোতে নিম্নমানের খাবার পরিবেশন ও সার্বক্ষণিক চিকিৎসক না থাকায় ছাত্রীদের ভোগান্তি তুলে ধরে হল কর্তৃপক্ষকে এসব সমস্যার সমাধানে যথাযথ উদ্যোগ নেওয়াসহ নিয়মিত এসব বিষয় মনিটর করার আহ্বান।
- গ. জনকর্তৃ : পোল্ডি খাতের অগ্রগতিতে সরকারি সহায়তার পাশাপাশি এ খাতের ব্যবসায়ীদের প্রশিক্ষণ ও ঋণ সহায়তা দেওয়া অত্যাবশ্যিক বলে অভিমত।
- ঘ. প্রথম আলো, ডেইলি সান : সড়ক দুর্ঘটনা রোধে পরিবহণ খাতে দুষ্চক্রের দৌরাত্ম্য বন্ধ করার ওপর গুরুত্বারোপ।
- ঙ. সমকাল : ময়মনসিংহের ফুলবাড়িয়ায় মধুপুর বনাঞ্চলে বানরের খাদ্য সংকটের হৃদয়বিদারক চিত্র তুলে ধরে বানরগুলোর খাবারের ব্যবস্থা করতে সরকারের পাশাপাশি বেসরকারি সংস্থাকেও এগিয়ে আসার আহ্বান।
- চ. ইন্ডিপেনডেন্ট : পাবলিক সার্ভিস ইন্সটিটিউশন কর্মক্ষেত্রে নারীদের অংশগ্রহণ নিশ্চিত করতে বিদ্যমান কোটার সুযোগ সুবিধা আরও বাড়াতে বলে প্রত্যাশা ব্যক্ত।
- ছ. ডেইলি সান : রাজধানীতে সড়কের পাশের যাত্রী ছাউনিগুলো মেরামত ও সংস্কার করে ব্যবহার উপযোগী করা সহ প্রয়োজন সাপেক্ষে গুরুত্বপূর্ণ স্থানে আরও যাত্রী ছাউনি নির্মাণের আহ্বান।
- জ. নিউ এজ : পার্বত্য চট্টগ্রামের বিভিন্ন স্থানে পাহাড় ও পাহাড়ের পাদদেশে ঝুঁকিপূর্ণভাবে বসবাসরতদের সরিয়ে নিয়ে নিরাপদ পুনর্বাসনের ব্যবস্থা করার ওপর গুরুত্বারোপ করে সম্পাদকীয় প্রকাশ করেছে।

উপ-সম্পাদকীয়

প্রথম আলো পত্রিকায় প্রকাশিত কলামে উল্লেখ করা হয়েছে, নির্বাচন কমিশনের উচিত রোডম্যাপ অনুযায়ী আইনের সংস্কার নিয়ে আলোচনাকালে সবার আগে সীমানা পুনর্নির্ধারণের বর্তমান আইনের পরিপ্রেক্ষিতে জটিলতা এবং করণীয় নির্ধারণ করা।

নিবন্ধ ও ফিচার

সংবাদ পত্রিকায় প্রকাশিত 'বর্জ্য ব্যবস্থাপনা' শিরোনামের নিবন্ধে অভিমত প্রকাশ করা হয়েছে, বর্জ্য আবর্জনাকে সুষ্ঠু নিয়ন্ত্রণের মাধ্যমে নিরাপদ অপসারণ নিশ্চিত করা হচ্ছে পরিবেশ সুরক্ষার অন্যতম প্রধান উপায়।

#

ফাহিমা/শুকলা/মরজিনা/রশীদ/তানিয়া/২০১৭/৯.০০ ঘণ্টা

